

Headline **Kampus UPM Bintulu serba kekurangan**
Date **13. Jun 2008** Language **MALAY**
Media Title **Berita Harian** Page No **12**
Section **Nasional** Article Size **139** cm2
Circulation **217920** Frequency **Daily**
Readership **2083000** Color **Full Color**



Kampus UPM Bintulu serba kekurangan

SAYA dan adik adalah pelajar di sebuah kampus cawangan Universiti Putra Malaysia (UPM) di Bintulu Sarawak.

Pada pengamatan kami, kewujudan kampus cawangan universiti tempatan, terutama di Sabah dan Sarawak, perlu diberi perhatian khusus oleh kerajaan supaya ia setanding dengan kampus di Semenanjung.

Umum maklum, melalui Rancangan Malaysia Kesembilan (RMK-9), peruntukan bajet banyak diberikan kepada pendidikan. Namun, kami di kampus cawangan ini masih jauh ketinggalan berbanding kampus utama di Serdang.

Nampaknya kampus UPM di Bintulu ini dianaktirikan tanpa perhatian.

Ada yang masih tiada kemudahan asas seperti buku yang mencukupi, makmal, koperasi dan mesin ATM.

Pelbagai anugerah dimenangi kampus induk dan dijaja sehingga ke seberang laut walaupun keadaan kami di Bintulu amat jauh berbeza.

Begitu juga dengan kurangnya tekanan terhadap disiplin pelajar. Masih ada pelajar lelaki yang bertindik di kening dibenarkan belajar. Pelajar seperti ini sepatutnya dikenakan tindakan disiplin.

Begitu juga, pelajar yang terlanjur dan mengandung luar nikah sekadar diberikan amaran dan tiada tindakan disiplin diambil.

Tambahan pula, tidak pernah diadakan kempen antimerokok, menyebabkan merokok menjadi perkara biasa di kampus.

Aktiviti di cawangan sama banyak dengan kampus induk yang mempunyai berkali-kali ganda bilangan pelajarinya.

Akibat paling ketara, gred peperiksaan kebanyakan pelajar yang sibuk terutama ahli Majlis Perwakilan Pelajar semakin merosot.

Sudah ada contoh kampus cawangan yang keluar dari universiti tempatan dan menjadi satu institusi yang mampu disegani.

Di Terengganu, sebuah institusi keluar dari UPM dan kini menjadi antara universiti perikanan terulung Asia Tenggara.

Ia mampu menguruskan sendiri tanpa kerehah birokrasi dari kampus induk, terutama yang terlalu jauh seperti kami di Sabah dan Sarawak mampu menjadikan kami institusi yang lebih baik.

Tindakan terbaik adalah membebaskan institusi yang terlalu terpisah dari kampus induknya agar menjadi satu badan pendidikan baru di bawah Kementerian Pendidikan Tinggi.

Bukankah anak jika hidup berjauhan dari keluarga perlu berdikari?

PELAJAR JAUH,
Rembau, Negeri Sembilan.